

SANAKA-NAKA HUPANNA PUISI BASA BAMBAM

Tim Penerjemah Bahasa Bambam

Sanaka-naka Hupanna Puisi Basa Bambam

©Tim Penerjemah bahasa Bambam

2020

Cetakan pertama

2020

SANAKA-NAKA HUPANNA PUISI BASA BAMBAM

Kada Sabatta

Kuhhu' sumanga' polepahaja sihatam sipäto' taäkä' längäm oloNa Puang Allataala aka pangngundu'na anna pantähänä'na lako Tim Penerjemah Bahasa Bambam sola Hadio Ballo Mamase anna to ma'pehingngi manontonna Hadio Ballo Mamase. Anna mane nabannei Wycliffe anna napahessa Konsultan nasuhum mala dipadadi mesa suha' naongei sanaka-naka hupanna Puisi basa Bambam. Inde suha' disangai "SANAKA-NAKA HUPANNA PUISI BASA BAMBAM".

Inde suha' malam lambi' lako pala' limanta aka pa'kamaseNa DEBATA. Kipelau anna tabatai issinna inde suha', anna mala tuttuam kehängäm kapaissanganta diona puisi basa Bambam, nasuhum la tuttuam deem lalanna taissam tapekalembasam puisi Ibrani talambi' illaam Battakada DEBATA.

Kiakui kiua inde suha', budapi tasipoleanna anna makambampi kakuhänganna. Dadi kipelau lako kita pada-pada kiua, ingganna tasipoleanna kita la umpasipoleanni anna ingganna kakuhänganna kita la umpaganna'i, anna mala inde suha' la tuttuam mapia, susi tuli'na, teem tono'na, la'bi-la'binna issinna.

Ma'katampasanna kpalanda' kada kuhhu' sumanga' lako ingganna to untuli' inde puisi lako motondä-tondäsam illaam paluäna Pitu Ulunna Salu to puha untolloam lupu' hesona susi dilingkaianna teem dipikkihanninna. Susi toi duka' lako to untuli'i tama komputer, to umbatai muolai Hadio Ballo Mamase, to umpahessai anna to umbannei nasuhum mala dadi inde suha' Puisi basa Bambam.

Handandam Puang Allataala untamba'kia' pada-pada.

Padam too.

Tanete, September 2020

TIM PENERJEMAH BAHASA BAMBAM

DAFTAR PUISI BASA BAMBAM

To mantuli': To Naala Kahihí' (Buangim)	8
Pua' Sela Pa'bahaningku	8
Basa Bambam	8
Hadio Ballo Mamase.....	9
To mantuli': Putra to Mamalli'	9
Ma'pani' kalua' umpentamai allo kamasannangam	9
To mantuli': Papa' E'di (Lemo).....	10
COVID 19 Uhhodo Lino	10
To mantuli': Tata' Dar (Panggajoam)	10
Kaom too to sihhapam humpu'-humpu' sumajo mutuhu' hibu'	10
Sangkalamma'ku anna Yolona	11
To mantuli': Putra Andihi Posi' (Hantekiha').....	12
Iko to umbotohoham sungnga'mu	12
Kende' buhana lino.....	12
Änä' Gassim	13
Lembä-lembäna, tanete-netena.....	13
Pa'pahandangam memali'-mali'	14
To mantuli': Titi (Pangngajoam)	15
To Umpekkalundangam Bottota	15
Sambajam Uma Galantangam	15
Pa'kasallei Bulammu Anna Allomu	16
To mantuli': Marselinus (Tanete, Desa Salumokanan Utara)	16
Änä' Gassim PUS (Pitu Ulunna Salu)	16

To mantuli': Ambe Udi (Sandangkondo, Tanete).....	19
Kamapiaam.....	19
To mantuli': Titi (Rantepalado)	19
Passikola	19
Karubem sule oom mepa'kadai	20
Balabo-balabo si ma'dasi	21
Katuboam illaam lino.....	21
To mantuli': Damai Sejahtera (Taneba)	22
Pahlawanku battu diua To Mangngebaku	22
Pehambinna Puäta	23
To mantuli': Mama' Hapi (Taneba)	23
Pa'kada	23
To mantuli': Hardi Bonggalino (Balatana).....	24
Pa'lambe Kamasakkeam.....	24
Kada Manda' Pangnganna Nene	24
Pangngundu' Debata Lako To Umpa'gagai Botto	25
Hadio Ballo Mamase.....	27
To mantuli': Altin Wastuti (Mehalaan)	28
Mesa Kada Beba'un Tau	28
To mantuli': Eagle 431 battu diua Ambe Ittom (Galum).....	29
Lilli'na Katuboam	29
Kada Sabatta.....	30
To mantuli': Efneldi (Tanete)	31
Memase-mase Kasuleanna.....	31
Senga' Kasalaam Senga' Dipa'kasubu-subui.....	32
Allo Kalappasam	32

Taditondom Pa'kamasena	33
Kuhhu' Sumanga'	34
Dosa Ma'ulalam	34
To mantuli': Rabawati (Lembä Tana Tanete)	35
Sambajam lu lako botto litä'	35
Tondä'ku Tanete	36
Muampai kasuleanna Puang Yesus	36
To mantuli': Putera Sang Merah Putih (Tanete)	37
Hadio Ballo Mamase	37
Pepakilalaam lako änä' gassim	38
To mantuli': Dewi Lestari (Salulemo)	38
Tuangguhunku	38
To mantuli': Putera Kahapa (Tanete)	39
Indonesia Ma'tulasam	39
Bajuam Penaba	40
Hadio Ballo Mamase	40
To mantuli': Sambolele (Tanete)	41
To Ma'kambi'	41
La Mendadi Sia anna Ballo	42
To Silumbangam Illaam Dapo'	42
Anä' Gassim	43
Bua Pemala' Längäm Olona Puang Allataala	43
To mantuli': Putera Kura – Kura (Tanete)	44
Batu Maguhissim Umponnoi Langi'	44
Botto Malobäku anna Tondä' Lamungam Taboningku	44

To mantuli': Mama' Lian (Peba Tanete).....	45
Allo Pengkitaam Kalappasam	45
Mana' anna Hongko'	46
To mantuli': Lite Akeka (Tanete).....	47
Kamapiaam Lembäta tä' Deem la Pi'de.....	47
To mantuli': Loly (Tanete).....	48
"Indonesia Kadadiangku"	48
Katuboam Bakahu Illaam Puang Yesus.....	48
Sikamase.....	49
Sambajangku	49
To Matappa' Dipassihapam Ballo anna Sia.....	50

To mantuli': To Naala Kahihi' (Buangim)

Pua' Sela Pa'bahaningku

O, mentu'nako kasahapuam anna solasubum
Tapengkilalai allo kasalleta tanggala' sapulo pitu
bulam kahua pissam illaam sataum.

Aka neneta Pua' Sela
Sola mentu' pejuang illaam Indonesia
Mubotoham sungnga'na mubali
Penjajah lambi' patalo.

Anna tasi'dimmi kita pole'
Mutahimaki' ma'hupa-hupa
Buhana lino kamasannangam
Mamasena Debata sola to ma'pahenta.

Basa Bambam

Kubata takulambam
Kupekalembasam senga'pa ia
Sapo' mamata Debata mukamasei
Hupataunna illaam inde PUS.

Napolalam musua to lambam le'bo'
Takuissam sanganna, takukaleso pakonaanna
Sule inde lembäta, untetem pesua-pesuana Debata
Umpapia Alkitab sola basata.

Toko kuissam duka' pole' kubata
Anna kupekalembasam
Napa'tiolo-oloam duka' pole' änä'ku
Sola basa Bambam.

Hadio Ballo Mamase

Takuita di tindo Takulambam pangngimpi
La malaki' sipa'kada-kada
Anna kende' katialaam penaba
Muhingngi poni-poniam ma'hupa-hupa.
 Aka mamasena Debata lako kita
 Muoloi to tadiita hambu apinna
Napadadiangki' Hadio Ballo Mamasa
Illaam Pitu Ulunna Salu dike'desam
Muolai tädo'na banua lajuk Tanete Tandungngalla'
Salumokanam Hantebulabam Timur.

To mantuli': Putra to Mamalli'

Ma'pani' kalua' umpentamai allo kamasannangam

Tihui' kakassiangku
Pada Tanete penabangku
silindo buhana lino kende' pa'tamba' Debata
Mambela penne'ku kubatti' pentekkaku
 Tiballa' kalua' illaam lembänä PUS
 O, solasubungku mamalli'ki'
 mangngalataba umpakahoa'
 taba dan canda illaam sirande maya-maya
Uham tamuuhanniki, allo tamualloiki'
tapengnganda' matoto' untadongkonni Indonesia jaya
Kuhhu' sumanga' dipolei pahaja sipa'sambayanganki'
Tiampa' kalua' muolai HBM.

To mantuli': Papa' E'di (Lemo)

COVID 19 Uhhodo Lino

Pahandu'na taum dua sa'bu dua pulo
Lino tihodo, lino pangngindang
Saidi' tatallang sihapang lopi
Napalusau hibu', napalutama uwai.

Lino pangngindang naponnoi kuasanna setang
Lino tihodo naponnoi dosa ma'hupa tau
Buda hupatau mahea'
Buda siam duka' bahani

Allo sibala' bengi
Malilling sisalle masiä
Debata ma'tamba' illalang inde lino
Debata ma'kuasa lako ma'hupa tau.

To mantuli': Tata' Dar (Panggajoam)

Kaom too to sihhapam humpu'-humpu' sumajo mutuhu' hibu'

Kao taiaä' Ambo' to umbännä'i hettem kopi päi',
taia toi bung Al to umbänna'i hettem änä' gassim,
kamahangku tä' susi mapianna kamahanna mba' li' sola
mba' Melin,
sapo' kaom too sihhapam humpu'-humpu' mahassam
kaimbä'-imbä' mutuhu' lalanna hibu', muäbä yabona bombam
piham amo la loe.

Kao tä' susiä' olo'-olo' to peande anna to bahani,
Tä' duka' susiä' uham bulam pitu
Inde tulasangku tä' duka' mapia anna tä' mampasahho sola
mampakamma' to mambata, anna tä' toi duka'
mampopetaba.

Kaom too mesa to mantuli' mupasihemum ma'hupa-hupa
tula' la kupadadi mesa tulasam, la mala diita, dibata, anna
dihingngi.

Kutolloam ingganna issi pikkihangku yabona mesa suha'
täppe' lako anna täppe' dio mai, sihhapam tula-tulasanna to
kolem anna to buta.

Tulasangku... tä' susi mapianna kalinda'da'na pandita
Arnol,

Tulasangku... tä' toi mupatidede' bua susi penaninna
bintang Lexstar,

Tulasangku... tä' duka' mala la mupadadi pamole lako to
mäbähham diona
tula-tulasanna kalinda'da',

Sapo' kusangai duka' kaleku mesa tula-tulasam mapia anna
pepakahanga.

Sangkalamma'ku anna Yolona

O solaku... Etaä' inde muampai kahebammu,
kukamallii anna sisolaki',
ingganna paningoanta to bali taolai sola mupomasannam
katuboangku.

Liba' satilalla'ä' kela malaki' sule silambi' anna tä'ungki'
siampai liu,

la kupadondoi liuko, la lu mumpa'ä' mutuhu' lalammu,
moinna anna balim napassi'i uham.

Sapo' la kulambi'ko, anna la solaki' sule,
muolai katuboam sitahhu'na,

anna la tatämpä'i sola ponno katilallasam anna ponno
kamapiaam,
la diakilalai liu sule lako salako-lakona.

To mantuli': Putra Andihi Posi' (Hantekiha')

Iko to umbotohoham sungga'mu

Tali maleammu, tali bahanimmu
Takim kalandomu, takim bahanimmu
Sissim batummu, sissim pa'jagamu.
 Patiampa' daum punti, patisembu' dalle batte
 Pasisassa' pahe hakam, pasilullu' pahe käppi'
 Pasilambi' nene masäe, pasitambeam waka' mahihi
 Pa'pemulunna balimmu, dibalisam pangngallo.
Tala honno' bulu salamba'mu
Tala tobä bulu sangkahumemu
Alloko tamualloi, uhangko tamuuhanni
Anggam Debata bettem matoto'ta.

Kende' buhana lino

Tadiita tindo
Tadilambam pangngimpi
Tadilambi' dipikki'
Tadisuhi' pakkulleam,
 Kende' buhana lino
 Kende' kamasannangam
 Eham-eham batu
 Eham-eham bassi,
Lumbu' alaam kinande

Sundum kapahalluam
Lambi' pa'pemulu
Sugi' ma'hupatau.

Änä' Gassim

Iko tulisangngondoku...
Iko däjä bulabangku
To ma'tallu sulekkaku
To massohä sihatangku.
 Pennenne' pessoemu
 Petaba-petaba tahatummu
 La kuu...aka naande indomu ammu
 dipangngidengam
 Lambi' dadingkoa' iko pole' änä' gassim mapahepa'.
Tala muissam lupu' anna hea'
To la sa'baha', meimam anna mehapam
La mendadikoa' andihi tatemponna pa'lembängam
La umpatahu'koa' pessalusipa'na nene diponene.

Lembä-lembäna, tanete-netena

Mengkalao yabo Tabang baka disura'
Mukamtembam Pana', tihandu' di Pasapa' Messawa
Menggulilim Matängä tihassa dio Tabulabam petaba mana'
peanti kadinge'
Mulambi' pessubunganna pamula tau, Pitu Ulunna Salu
kahua ba'bana Binaga.
 Menggulilim Ahalle, Mambi, Bambam su'buam ada'
 tundangam lappa-lappa
 Mupateka' mambulillim, tisampo di Mamasa posi'na
 kapahentaam

Muhuttu' salu Mamasa, muolai Tandu' Kalua' Palasa
Mahosom
Mukatembam Oho Pondam, tihutu' dio Hantebulabam
to ma'dua takim ma'tallu sulekka.
Mupake'de' kasitammuum bakahu, iamo Hadio Ballo
Mamase
Mupasilambi' salu haha, mupamalunu kasahapuam,
Mupamatoto' kakalebuam, mupatiambo' kaheba mapia,
Mutampo punti kabiasaam, pangnganna nene pa'palumpum
tomatua.

Pa'pahandangam memali'-mali'

Tanete-netena...

Lembä-lembäna...

Salu-salunna...

Anna kaju-kajunna.

Mendadi pa'pahandangam memalli'-malli'

Mendadi pa'saleoam masannam-sannam

Mupatihandu' penabanta

Mupaende' pahajanta.

La digalla' tungka sanganna...

La ditede-tede gallahanna

La dipa'paissangam lako handanna langi'

iamo.....iamo.....iamo.....

Gändä Debata, Mambulillim anna Kepa' Landa Banua tanete
malangka'

Buntu Mussa', buntu Liarra' pa'pahandangam

Sahambu Sambabo, sahambu Liawan pendiosam änä'
mangnguha

La mendadi bunga-bunga tamalassona Kondo Sapata' Uwai
Sapaleleam.

To mantuli': Titi (Pangngajoam)

To Umpekkalundangam Bottota

Dikuhhu'i sumanga' dipolei pahaja muolai pekkalundanna
Nene to taponene Isanga: Demmatande, Demmarantang,
Pua' Sela Pua' Tallue, Pua' Bussam,
Takompa Tandung, Pua' Dakka,
Mabakkai, Me'matte
Tasangehang Daeng Mahela,
Takulang Daeng Ma'dandang,
Daeng Manggasa', anna
Daeng Malimbong.

Deem napasitumä sungnga'na
Mujagai bottota
Sapo' sanga kasallena
Tä' mala dipa'dei
Lambisam inde bottota
Mala dadi susi inde.

Sambajam Uma Galantangam

Pahe mupatubo dio uma
Inde lino anna galantangam
Kukuhhu'i sumanga'
Umba susi inde pahe
Ma'kuhhu' sumanga' matim
Tubo dio mai hossä'
Mahihi dio uma
Mendadi bahha' lambi' dadi bo'bo'
Diande pada-pada
lam too kähä handam matande

Lako pahe anna malakam
Ma'pasule matim oloMu.

Pa'kasallei Bulammu Anna Allomu

Mama'...Papa'...
Mapahhi' anna masussa
Wattu anna didadiannä'
Mengkalao bahinni'ku mupatuduä'
Mama'... Papa'....
Mupakasalle lambi' muissammä'
Duka' diuaam kamapiaam
Anna kakadakeam
Mama'...Papa'
Pembudakoa' kutimba'
Sapo' mupa'sambajangam mandä'
Lambi' malaä' dadi susi inde

To mantuli': Marselinus (Tanete, Desa Salumokanan Utara)

Änä' Gassim PUS (Pitu Ulunna Salu)

- Änä' gassim Pitu Ulunna Salu
- Pandadianna Pongkapadang
- Pelombunna kada ada'
- Pepaondom tulasam tomatua

- Änä' gassim P.U.S to muissi Tabulahan
- Petaba mana', pebita' pa'pahandangan
- Indona litä', to mepaihanna P.U.S

- Petobe saku' peanti kadinge'
- Änä' gassim P.U.S to muissi Rantebulahan
- Indona lembä, to makakanna litä'
- To ma'duatakim ma'tallu suleka
- To la mupapia to sisalabingkum silanda mata wase

- Änä' gassim P.U.S to muissi Bambam
- To disa'bu' su'buam ada'
- Sangkeran tinting rodoan lappa-lappa
- To la mutundam lappa-lappana Pitu Ulunna Salu

- Anä' gassim P.U.S to muissi Aralle
- Indona ba'bana lembä
- Indo' Kada Nene'
- To la mulingkai ada' sibali-bali

- Anä' gassim P.U.S to muissi Mambie
- Lempo kuring, paya kandeang
- To muisunni lantang kada Nene'
- Ongeam pa'lisuanna to keada'

- Anä' gassim P.U.S to muissi Matangnga
- Andihi tatemponna Pitu Ulunna Salu
- To la matoto' ma'katea' patomali mujaga bihinna pa'lembängäm
- Tappu' sitappusam puha sipuhaam ke deenni to la sule mudake-dake PUS

- Anä' gassim P.U.S to muissi Tabang
- Baka disura', gandang diroma
- Talaunna kada nene'

- Bubunganna kada ada'.
- Ooow inggannako äinä' gassim Pitu Ulunna Salu
- Susi burana lino tentomai sanda dio mai - Siteppa-teppa sisao oninna
- Senga' tulasam tomatuanta senga' toi kadanna to sulibam
- Susu dahampi mepasusui anna angganna.
- Oooww äinä' gassim P.U.S
- To muissam lohonna litä' anna hupatau
- Tontäkoa' okko'i okkosammu isunni isungammu simesa-mesa
- To la mutetengko Pitu Ulunna Salu illaam Republik Indonesia di dako'na.
- Kamahempoam Penaba
- Ooo, inggannakoa' to digente' bahana' hombena pa'bottoam
- To silolem isanga sipa' sambulo-bulo
- To muanda'i isanga tulasam tomatua
- lamo himpa' anna mahimanam
- Bangungko inggammu to mamma'
- Titundangko inggammu to metindo
- Ammu pentiongam tama sangka' anna ada' simeimangam
- Anu' to puha nasau' anna nalisu nene to diponene
- Ke'de'ungko sibaba hamme' sitonda penaba litä'
- La muleleam sipa' mattunggaianna
- Alloko tamualloi uhamko tamuuhanni

- Tangkapohasam tangkabissisam
- Anna ke deem da wattu malona'
- La ditunu di ulunna salu anna la bauam dio ba'bana minanga.
- Padam, kuhhu' sumanga'.

To mantuli': Ambe Udi (Sandangkondo, Tanete)

Kamapiaam

Tatibeho susu' tatidende katonam,
 angganna kada ada' tula' tomatua,
 pepaondom dio mai nene to diponene,
 anggam kamapiaam la diballa' inde lako.
 Itako lalam mapia,
 daa mupopesolo' pennenne'mu,
 tongaiko längäm bulam
 aka yabo too asanna.

To mantuli': Titi (Rantepalado)

Passikola

Angga' si metaba-taba tette'
 tisedam dio rindim
 meita ma'padidi'
 silele siam kunenne'i

Malillim...malillim...

Tittedo anna basa,
Malussu nanene mata allo,
Penanninna tambu' angga'
Si la ma'papotti' mataba.

Maluppu'... mapi'di'... anna masussa..
Anga'-anga'na tä'um la dibela mentekka.
Mennene' kairi mannene' kanam
si buttu petaba-tabanna bulangku anna alloku
ma'petua' langam anna ma'mengu'ku nää' songko sarjana
angga' si tipapi' metaba-tabu
Sapo' kuita ke'de' metaba anna mubussangam penabanna
ma'tula' naua
"Abana la mentekka liuä"

Karubem sule oom mepa'kadai

Eta inde mesa-mesangku
Musa'bii lendu'na mata allo..
Mesaileä' buttu lindo petaba-tabammu pamalussu penaba
masakkeku.
Sapo' kasuleammu anggam sapäi' naliliam pepabi karubem.

Ooo...to mambelangku...
To'do uwai mata mukilalai
Si solaki' si petaba mupamatoto' pattujunta.

Temo... dioki' ongeam si sengasam
Nabai tanete malangka' anna le'bo' kalua' ...
Anggam mesa pepasangku la nababa pepabi karubem
Palambisanna' kada mamali'ku lako bulabangku...

Balabo-balabo si ma'dasi

Si kaolinaua: beba'... beba'kam pole'
Sapo' senga'na, muamma' elo'na
Mubali kalindoro-kalindoro tadea'

Si kaoli... naua: beba'... beba'kam pole'
Sapo' senga'na, si pekakutana umbam kao ngei tabaku?
Umba omo si'da ngei tabana?
Umbai' naliliammi lao pepabi?
Umbai' raka aka barinni' sugali'
Anna malai dipatama kantonna baju si ma'dasi anna si
ma'patalanai?
Tä' ponala pole' diissam.

Si kaoli naua: beba'...beba'kam pole'
Beba' umba amonna ngei?
Pangitanku anna pangitanna
Beba' dio balabo-labo si ma'dasi.

Katuboam illaam lino

Maka' masannam oom penaba dio allo mebenggi'...
Hosso penaba sitinggajo Debata illaam sambajam...
Ma'kurru' sumanga' mukilalai mamasena illaam katuboam
pura diboko'i...

Längäm allo, buda tau tadipoleam penaba...
Metaloi kamoream la ma'podo kao...
Pessoe pentekka, nataloi kamoream la ma'dua tambu' la
ma'tallu sumusu...
Mukalembei dodona litä' anna bajunna kaliane...

Dioi lendu'na allo... Penaba mapia tä' nabela mukambi'
pa'palakoam...
Umpogau' dosa, dipokabiasaam...

Pissananna bengi sule mepa'kadai...
Mane sule panossoam penaba...
La tontäpaka susi inde pa'palakoam?
Deempaka lalammu ma'pamalolo?

To mantuli': Damai Sejahtera (Taneba)

Pahlawanku batu diua To Manggebaku

Illalam kapemase-maseanna mahammo anna illalam
kamaitu-ituanna bengi
bätä puntimmu mahasssam tilole'
Anna illalam mahasssam mellao hibu'-hibu'na tanete
bätä puntimmu mellube salako-lakona

Iko tadiissam sangammu anna pa'palakoammu dikalembei
Oh ku'bu' takesanga mennangko muampuam mengkalao
eta?
Oh ku'bu' takesanga dipelleiko naponnoi sobä'.

O....To Manggebaku
Kao to muampuango anna kao to la umpa'kasalleiko
Pa'palakoammu la tontä kukilalai illalam mentu' katubongku
Patalo... patalo...TO MANGGEBAKU.

Pehambinna Puäta

O mentu' lindo modandam anna hupa ma'tehe-tehe
Takandappai kaleta anna ma'sampung talibobom
Ma'sampung pudu' umpilei kada
Mukambi' alla' tala sibingkum

Umbasei lima tala maho-maho
Tesse tanete bussu le'bo'
Maingko anna maingko,
Tama'baju pole ma'dodo pole
Aka pehambinna puäta
Kaleba-leba menna amo la nahua.
Padam too

To mantuli': Mama' Hapi (Taneba)

Pa'kada

Maka' la mentamam kahubem
Memamba-mamba umponnoi tondä'
Anna maka' tibukka baja
Metundam pa'kada.

O, solasubungku
Anna mentu' kasahapuanguku
Maaka kahebamu?
Anna salama' matim.

O.....hadioku
Anna ballo mamaseku
Kuhhu' sumanga'

Anna pole pahaja

Kupelau matim

Anna la tontä ke'de'

Hadioku.....balloku....

Mamasemu kusi'dingam.

Padam too

To mantuli': Hardi Bonggalino (Balatana)

Pa'lambe Kamasakkeam

Oh, Indo' Ambeku, pepaihangannä'

Lambeannä' kamasäkkeam

La laoä' mambela lako tondä'na tau

Umpeä kapaissangam mulingkai kakeakasam.

Kulle anna bulabam, mala dipa'deam

Kapaissangam ia la tontä liu

Kakeasam keangga' puha ia anna bulabam

La laoä' kudangganni lako botto mambela.

Oh, Indo' Ambe'ku, pepaihangannä'

Pa'lambeannä' allo anna bengi

Angku mala tontä liu masakke

Silolongam pangnginaba-nabangku.

Kada Manda' Pangganna Nene

Kada manda' pa'pahippi' tomatua

Dianna mana' dipalumpunni bulabam

Dipa'baju dipa'dodo

Illaam pessoe anna pengngujä'.

Ma'bunu' salämpä', salampa bulo-bulo
La diissam mahea' anna masihi'
Tala mailu tala matinna
Tala ma'bija tala ma'sangngana'.

Tala tuppe la'bo' tala himbä wase
Tala mali-malisam tala bassa-bassaam
Tala ma'dua tambu' tala ma'tallu sumusu

Umpake tappa' anna sindoho
La ma'bahha' dihamme pallumu-lumu
Anna la mahimpa' mahimanam.

Tulasanna tomatua,
Diposangka' tubo illaam lino
Dipotendam tatilenggu'
Dipotete tamahapo
La tinada lako ongeam masannam
Mempokom tassaju', mengngette' tambalala.

Pangngundu' Debata Lako To Umpa'gagai Botto

Eh... naunduham, anna naolaam Debata metampa,
Mentu'na pa'bahaninna, anna londä-londäna Indonesia,
Umpengkutä'däsam, umpa'gagai botto litä'ta
Umbotoham sungnga'na, napomoka didakka' liu bata'
ulunna.

Eh... naunduham, anna naolaam Debata metampa,
Mentu'na Sambolangi'na, anna gäjä bulabanna Indonesia,
Umpamesa pattuju, anna umpasaujum buku,

Muhisi lao to ma'tandu' masadi', to ma'palasa mahosom.

Eh... kuhhu' sumanga' anna polepahaja, längäm Debata,
Allo kasapulo pitunna, bulam kakahuanna, taum sasa'bu
keseha hatu' appa' pulo lima,
Mendadi allo kalappasanna Indonesia,
Napomannassa, anna napenta'leam Soekarno-Hatta.

Eh... naunduham, anna naolaam Debata metampa,
Mentu'na bija pattola, mentu'na to ma'haha bumbungam,
Umpaokko' lima batu longkahhinna Indonesia, battu diua
Pancasila,
La dipa'buju dipa'dodo, anna mala kende' kamasannangam.

Ma'hupa-hupa Pa'padadinna Debata
Memängä-mängä diita pa'padadinna Debata,
Illaam botto litä'ta, Pitu Ulunna Salu,
Tä' ia deem diita lako botto' senga':
Sahambu Sambabo memängäm-mängä,
Sahambu Mabatu umpatande'de' talinga.

Buntu Pesse' mekähhä bulu,
Takatio mepatilalajam,
Leä Batu mepilla'-pilla',
Gahoä Mandalam mehätäi,
Salu Mengkasillim mepakahea',
Batu Ma'isi angga' to metabä,
Buntu Messila kahampoam mata.

Memohona pentalodona Tasuma'ilam, mepepessaile,
Anna budapi illaam tondä'ta, umpopa'gändä-gändä bua,
Makambampi illaam pa'lembänganta, memängä-mängä.
Eh... memängä-mängä tongam diita,

Pa'padadinna Debata, illaam Pitu Ulunna Salu.

Hadio Ballo Mamase

Eh...Tanete Tandungngalla', Salumokanam Pitu Ulunna Salu,
Nakakende'i buhana lino illaam lembäta,
Nahampoi pa'mana' pa'kamase Debata, yamo Hadio Ballo Mamase.

Eh... Hadio Ballo Mamase, diongei uhhingngi kada Debata,
Hadio Ballo Mamase, umpasiissam to sikambela-bela,
Hadio Ballo Mamase, umpasikaluno to sikhuku',
Diongei uhhingngi penaniam, dipamoleiam malupu'.

Hadio Ballo Mamase, pa'mana' Debata,
Umpasule sumanga', umpakulii kamamallisam,
Umpakende' gaha', diongei umpa'kadai kasahapuam,
Hadio Ballo Mamase, diongei uhhingngi ä'mä'na lino.

Eh... dipelauam tamba' dipa'lambeam kamasakkeam,
To ungkulleii, anna dadii Hadio Ballo Mamase, to umpikkihannii.
Dipelauam tamba' kamasakkeam, ingganna to si ma'hettem,
Debata la mutamba'i.

Padam too, kuhhu' sumanga'!

To mantuli': Altin Wastuti (Mehalaan)

Mesa Kada Beba'un Tau

Lambi'um wattunna inde massa'bu rara tibollo

Lambi' wattunna inde penawa le'ba'

Lambi' wattunna inde lollo' tiseran

Mesa randan parallu dibaya'

Mesa malanna tau beba'

Anna mesa kada beba'un tau.

Lambi' wattunna daerah-ta beba'

Lambi' wattunna negara-ta beba'

Negara kasalleta suwun.

Lambi'um pangnginawa-nawanna

Angganna to ma'bundu'

Aka sibaya'um rara tibollo-bollo

Anna uwai mata.

Sule lako angganna penawa le'ba' asan

Anna mala mesa kada tau dikua beba'

Tae' dibela diissa'

Angganna ma'rupatau mate illalan pa'bundusan

Anna kende' kamasannangan illalan nasisi'in lita'ta

Anna kasalle penawanna to mate lambi' metawa

Aka nasa'ding-un kabebakan

La napennassai ingganna tau

Anna tentomai angganna ma'rupatau

La ma'kada nakua beba'un tau.

To mantuli': Eagle 431 battu diua Ambe Ittom (Galum)

Lilli'na Katuboam

Mengkaloa simesa-mesa hupatau buttu di bulanna anna
allona,
dio mai lino masiki' iamo lino kaseha bulanna
Inna silolem isanga sipa' sumahho, tasiampuam isanga
sampim sasehe'
Tilläppu' anna ma'ohä' mentama inde lino malobä.

Tama'tantu katuboam sanaka allona sanaka minggunna,
sanaka bulanna anna sanaka taunna
Mennangka umpasohonni mentama inde lino?
Taissam pada-pada taua buttu di to disa'bu' Lalisam Tallu
yabo tängäna langi' To Tumoko yabo lisunna bataha.

O peampoanna to sumahho anna uwai mata!
Inggahanni kumua, to umpahalluangki' solata anna to
napahalluangki' solata
La sibaba sipa' mahamme', la siampuam pangkaha'
pa'kamase, himpa' anna himanam.

O hupatau to tubo illaam pangnginaba-naba lobo' illaam
kaphalluam!
Umbako ngei tohho anna umbako ngei ma'ohoam illaam
inde lino?
Mannassa anna maleso illaam libusam Indonesia.
Untadongkonniki' simesa-mesa pa'bottoam,
Pahallu taissam annana litä' anna lohonna hupatau
Tontäki' mesa penaba anna mesa pa'palako.

O inggannako pakka'!

Behoi kalemu nakutu'i to disämpä limanna mendadi pekutu'
Sibaba sipa' mapia, sitahima mesa sola mesa,
unte'geham kada sahandam nakattu handangam pudu'.

O inggannako ma'hupatau mantu'nako ma'tanda to lino!

Sibabako gantam siampuangko petimbam

Umpake sipa' ole lako ole dio mai

Tama'bija anna tama'sangngana

Lako padamu ma'hupatau.

Susim too lima balajam lilli'na katuboam, pahallu dioli'
mamma' disalungku metindo.

Kada Sabatta

Hapa'ko lindo modandam hupa ma'tehe-tehe,

Patananni talingammu palempei sulim patomalimmu,

Deem tula' sabatta lu lako ingganna sihendem loloku,

Anna kende'i kamalangngisam illaam penabanta.

La masakkeki' mahuhindim, tanabuno duhi tana se'bä' luäjä'

Muinna anna napali' tintingki' poppoham bassi

Tadiita hupanna tadikalesoa bätäna

Kende' illaam lino, dadi illaam Indonesia.

Sapo' ke kapodi'ii tanalambi'ki' ke kalandaoi nalebangki',

Tontä ki' sianti paiham, mentobe manda' mengnati matoto'

Natihandu' ada' tapanallangam sangka' tasusu batuam

Titanam sakku' tiambo' kadinge', mendadi tamba' anna

pamole.

O inggannako to sibaba lalam penaba,
To siampuam dudungam
Taoli' mamma' tasalungku metindo, paondonna nene, tula'na
tomatua
La siihusangki' uwai sumule, sibabaam peleko' pa'panampe.

Te'gehanni, kondo tedom tanpa bulabam
Abihanni, tubo tammate mapia tangkadake
Mesa kada dipotubo, pantangkada dipomate
Napolalam, tubo tallu lolona kende' tallu bulinna.

To mantuli': Efneldi (Tanete)

Memase-mase Kasuleanna

Bahum olo'-olo' naongeti tibussam
Nadidi hibu' nannahi dibe'bei sampim sasehe'
Tanapamamma' moninna olo'-olo'
Sadekem buana sabakam bulabam mentu'na to ma'kambi'.

Mellao allo bengi tanaissam lupu'
Tasisususam bulu matanna umpa'maha'-maha'i dombana
Natumpu mentanetena nalambam mellembäna
Umpa'lepa-lepai mentu'na dombana.

Mepatette lako lalam malolo
Aka silele mangngopä' hupatau
Mepaindoi kamasiäsäm mepaitai katuboam
Aka hupatau nakapu' kamalillingam.

Memana' lalam katuboam

Nasangai senga' di hupatau
Meanta' di kamasannangam mepatette di kamalinoam
Dipängam di tuntungam su'be' didakasam pa'posanga-
sanga.

Senga' Kasalaam Senga' Dipa'kasubu-subui

Dio Getsemani maitu-itu tängä bengi
Untapposam pollo'na napasindum mentonga
Oh Ambe' maka' umpoelo' alai inde pi'di'ku
Sapo' Pa'elo'-Mu la dadi taia pa'elo'-Ku.

Sule Yudas umpasola tau buda
Uhhui' doke untetä mataham
Le'ba' simesa passikolanna napellei
Mesa-mesanna tohho umpendudum dosa buda.

Nahui' sesse' sohodadu susi pa'boko
Natuhi' tau buda sikaoli patei, patei, patei
Ditampilim, ditikkudui, ditembe' talukum
Senga' ma'gau' senga' dipi'di'.

Pesämbä'na sohodadu melalam sukka'
Päso' masadi' susi suha bium dituttu' tama
Mentama kadeasanna doke daum bulo
Haha tibollo umbasei dosa budangku.

Allo Kalappasam

Bihha'na allo paindo tama lokko' lo'bä
Lo'bä lokko' anggaham pebalum tihongkä'
Malaika' ke'de' umpa'kadai baine
Indo', pa'dem inde aka puham tibangom.

Setam anna dosa maläi kute'-kute'na
Kakadakeam tihisi lako handanna langi'
Sampim pesapa' tipa'dua, tibukka lalam
Ke'de' eham di langi' dadi kasilombungam.

Ma'sappa-sappa ingganna to matappa'
Kahidä-hidä ingganna to napungo dosa
Sangkala bassinna setam huppu'-huppu'
Sule kamalinoam kende' kamasannangam.

Suhuga tambim maseba-seba
Ongeam kamasannangam sule lakona
Lino lappa' illaam mai api tapi'de-pi'de
Tibähhä' uwai sule allo kalappasam.

Taditondom Pa'kamasena

Umpellei ongeam kamatandeanna
Le'ba' uhhuttu' domba bulinna
Umpatohho okkosam kahajaanna
Tama lino umpesäkäi to madosa

Ma'songko' keduhi metuka' längäm Golgota
Umpa'kadua-duai to la tama nahaka
Untumpu tuka' umpassam kaju sitambem
Mutanggum dosa budanna ma'hupatau

Untambai hupatau aka la tama nahaka
Nasumbali'i, natikkudui anna natampilim
Umpatudu hupatau aka muola lalam sengko'
Natimba' päso'i yabo kaju anna mala mate

Sa'baha' muolai to madosa anna to kasalaam
Tatikamellum dipakolo'-kolo'i
Tatige'ge' untammu pandahhaam
Anggam pissam ma'kada... Ambe' panampunni
Aka balam tanaissanna.

Kuhhu' Sumanga'

Kuhhu' sumanga' Debata, kuhhu' sumanga'
Umpadadi-Ko langi' anna lino sitonda issinna
Sanda dio heem olo'-olo' anna tanangam
Litä' malompo katuboanna ma'hupatau.

Kuhhu' sumanga' Debata, kuhhu' sumanga'
Sule-Ko inde lino mehhupatau
Tibollo haha masehomu umbasei dosa
Untässu'i-Ko ma'hupatau illaam mai nahaka.

Kuhhu' sumanga' Debata.. kuhhu' sumanga'
Ummana'kanni Indonesia kadadianguku
Ullappasam dio mai to ussabua'i tallu hatu' lima pulo taunna
Ummana' litä', uwai le'bo' galantangam.

Kuhhu' sumanga' Debata kuhhu' sumanga'
Ha'ja'na membea' sikamase
Mengkalao illaam Sabang sule sau' Merauke
Buda ada' kabiasaanna sapo' mesa.

Dosa Ma'ulalam

Lino ma'duhho napipi'i dosa
Pa'bundusam napobungam bibi molembä -lembängäm
Pelamungam malea dio katappaam mata

Kaliane nabäe-bäe mala'bu'.

Pengkaloa' kende' längäm tängäna langi'
Uwai mata tumähämpa' dokko apa' litä'
Sakilele kahha' napa'baju kaliane
Bulleam kalandu takattu tiso hom.

Gau' situmpu mendadi salu kabiasaam
Hoä' anna aha' dadi lako diomai
To matua tamengka tomatua, änä' tamengka änä'
Ambe' indo' änä' titähhä' sipembokosam.

To untanam pahe kende' hea mapa
Olo'-olo' dappo' naala hopunna
Kakobeam musamboi lino
Silele umbukku tambu'na tadea'.

To mantuli': Rabawati (Lembä Tana Tanete)

Sambajam lu lako botto litä'

Kassikam anna tilalla'
Aka ingganna pattujum-Mu sola pa'elo'-Mu
Ma'mesakam illaam sanga Maseho-Mu
Mendadi umma' kahajaam-Mu.

Kipelauam pa'tamba' lu lako bottoki Indonesia
Anna mala tandaam pa'kamase-Mu o..Debata
Ke'de'kam sitonda sambajam matim olo-Mu
Kahana malakam muolai kalappasam dio mai kasabuasam.

Anna la dadim too kaha-kaha kasalle
Illaam bottoki Indonesia
Anna lappa'ungkam dio mai saki lele
Aka anggam sangammu la dipa'kasallei.

Tondä'ku Tanete

Tondä'ku Tanete
Tondä' kuongeti dadi
Tä' deem pada samapia
Ketuboi tau sikamase mesa sola mesa.

Tondä'ku Tanete
Mengkalao bahinni'ku sule lako temo
Tä' deem la kukalembei
Moi umba kuola tontä illaam penabangku.

Tonda'ku Tanete
Tontä liu kupa'budai
Illaam mupakende' kakalebuam
Mengkalao temo sule lako salako-lakona.

Muampai kasuleanna Puang Yesus

O...inggannakoa' solasubungku to matappa'
Tapeäi lalanna anna tontä takilalai
Ingganna kada pahentana anna pepatuduan-Na
Puang Allataala toi mepasalama'ta.

Illaam muampai kasuleanna Puang Yesus
Buda to nakuasai pa'elo'na sipa' dosa
Buda to tä' untuhu'i Pa'elo'-Na Debata
Buda to mukalembei kamatappasanna.

Sapo' allo kasuleanna Puang Yesus
La sihhapam kasuleanna to maboko
Tä' deem la dibai-bai
Anna tä' deem diissam allona.

Iam too nasuhum
Anna pahallum tubo maseho
Pahallu tau tubo matappa'
Anna pahallu mapia kasilombunganta Puang Yesus.

To mantuli': Putera Sang Merah Putih (Tanete)

Hadio Ballo Mamase

O... inggammua' to untadongkonni Pitu Ulunna Salu
Pa'kuhhu' sumanga'koa' ammu pa'polepahaja
Untilalla'i Hadio Ballo Mamase
Mepasitammu di loa mepasissam di lawwa.

Mepassipa'tula' mepasipa'kada kasahapuam
Molai gamaha muola loa
Muolai pantuli' muola lawwa
Moinna anna naalla'iki' buntu mesapa'i salu, banua
sitäntängam tondä' sikambela.

Napasakutu'ki' napasaba'ba'
Muolai hettem sibala' hettem
Nabännäi to ditodinni to dipilei
Dike'desam muolai tädo'-na Banua Laju Tanete
Tandunggalla'.

Pepakilalaam lako änä' gassim

O... inggammua' änä' gassim mentu'nako änä' lolo
Pameäko kakeakasam daka'ko kapaissangam
Aka ikonna' hannuanna botto, sussaheanna pa'lembängam
La muissii libusam kahahhanna Indonesia.

Memboko'ko napengkolo'i messa'deko napengkepä'i
Umbaba babangam di ada' ussoeam kapahentaam
Menna pole la dihannuam, menna pole la disussahei
Änä' gassim änä' lolo tangkaduangam.

Aka kitanna' too andihinna Indonesia
La tajagai anna tää'i hompo
Aka lappa'kia' dio mai pandahhaam
Aka ma'mesakia'

Iam too anna la tajagainna'
Bandeata anna tä'i tuhum
Yabo mai ongeam handam matande
sapo' la tipappi' sule lako salako-lakona.

To mantuli': Dewi Lestari (Salulemo)

Tuangguhungku

O... tuangguhungku mapia sugali' pepa'guhuammu
Mutammuiä' mebengngi' malutte'
Penabangku tä' deem pada satilalla'

Anna penabangku malinnom liu.

O.. tuangguhunku malunä' liu pa'tula'mu
Mupatuduä'i muissam kaleku sola
mubukkaiännä' ba'ba penabangku
Anna mala kuissam umpe'guhui kamapiaam.

O.. tuangguhunku lako kalemu tilalla'ä'
Illaam issi penabangku ma'dandiä'
Pepatuduammu la kupaillaam penaba sola kutuhu'i
Anna pahentamu la kupe'guhui liu.

Pepa'guhuammu la tontä liu kupe'guhui allo anna bengi
La mendadi hä' too änä' to keguna
La keguna lako botto anna litä to kuongei
Illaam allo – allo la kutingngajona.

To mantuli': Putera Kahapa (Tanete)

Indonesia Ma'tulasam

Indonesia ma'sanga bandeha Merah – Putih
Bandeha Merah – Putih ma'tulasam
Lakona taum sasa'bu kaseha hatu' appa' pulo lima
Indonesia naokko'i botto senga', nadahha.

Indonesia mengkähä mapi'di', mendio' appu' sitammi' uwai
mata
Yabona pandahhaanna botto senga'
Nasuhum muala kada sahandam to kasallena Indonesia
Napunggu' Soekarno nabäkke'i Hatta.

Muala kattuum la manggeba
Illaam panggebaam sipuli-puli sungnga'na
Lambi' mate titollo hahana tumballa' bakkena
Tanggala' sapulo pitu bulam kahua
Taum sasa'bu kaseha hatu' appa' pulo lima
Indonesia untandeam bandehana tanda kapataloam.
Indonesia mala patalo tontä patalo.

Bajuam Penaba

Kamaseiko padammu
Umba susi ungkamasei kalemu
Maka' umpohäe nakamasei solamu
kamaseiko duka' solamu.

Tuboki' illaam lino
Bajuam penaba dipalako
Maka' melo'ko napomasannam solamu
pomasannangko duka' solamu.

Inde bajuam penaba
Paondonna tomatuanta
Tula'-Na duka' Debata
Lako ma'hupa tau pahallu la napalako.

Hadio Ballo Mamase

Dikuhhu'i sumanga' ke'de'na Hadio Ballo Mamase
Hadiota pada- pada
Diongei sipa'kada- kada kasahapuam
Diongei sipaissanni saha, susi saha tobu

teem saha mate.

Muolai Hadio diongei sipa'kada-kada
Muolai Hadio diongei siissam-issam
Diongei umpehingngii batta kada Debata
Hadio Ballo Mamase diongei umpehingngii penaniam
penaniam umpamolei lupu'
Umpakende' sumanga' umpatiala penaba.

To mantuli': Sambolele (Tanete)

To Ma'kambi'

O.. to ma'kambi'
Petua' manappai pakambi'mu
Daum lamba' b  b  i dana mehonno'i
Hendenni lako humpu' mahombo.

O.. to ma'kambi'
Andaham matai pa'kambi'mu
Maka' mab  hh  m, paihu'i uwai mah  nd  
Maka' napahalluam la mueli'-eli'i.

O.. to ma'kambi'
Maka' bulim dombamu huttu'i
Maka' pa'de pe  i sampe mulambi'
Jagai manappai allo anna bengi.

La Mendadi Sia anna Ballo

O.. inggannakoa' to matappa'
La mendadi balloko illaam lino
La mendadi siako illaam salu katuboammu
La mendadiko änä'-Na Puang Allataala.

O... ingganna koa' to matappa' matappa' si'da-si'dako
Lako olo-Na Puang Allataala
Daumpakalando ia kulle illaam lino
Anna kulle di ada' la mutampeam.

O.. inggannakoa' to matappa'
Majako allo anna bengi
Tontäko pa'sambajam
Längäm olo-Na Puang Allataala
Aka inde lino – lino pangngindam
Pissam wattu la ditallanni.

To Silumbangam Illaam Dapo'

O.. inggannakoa' to mandapo'
sipa'kasalleiko illaam dapo'mu
O.. to titanam ambe kamaseiko bainemu
O.. to titanam indo pa'kasalleiko muanemu.

O.. inggannakoa' to mandapo'
pakamajako ingganna änä'-änä'mu
Pengkaha'ko längäm olo-Na Debata
Peada'ko anna maimam längäm Debata.

O.. inggannakoa' to mandapo'
Lämmä'ko meangga sikummu mengkähä

Manuhu'ko lako to ma'pahenta
Natamba'ko Debata illaam dapo'mu.

Anä' Gassim

O... inggannakoa' änä' gassim
Pa'kasalleikoa' ambemu sola indomu
Pehingngii manappai ingganna pepakilaam anna
pepakahi'diam
Daumbali-bali bulammu anna allomu.

O... inggannakoa' änä' gassim
Pengkahea'koa' lako olo-Na Debata
Palakoi ingganna pahentana
Bassa'ko batai batta kadan-Na.

O... inggannakoa' änä' gassim
Padeengkoa' kakalebuam illaam tondä'mu daum tiseham
bäbä
naundu'koa' anna natamba' Debata illaam salu katuboammu.

Bua Pemala' Längäm Olona Puang Allataala

O... inggannakoa' umma'-Na Puang Allataala
Pomasannanko penabanna Debatammu
Daum pi'di' penaba Debatammu
Penggolo manappako lako sitonda unä' penabammu.

O... inggannakoa' umma'-Na Puang Allataala
Pabahei lako Debata bua pengkähämu bahe sapulona
umbasusi tisuha' illaam Maleakhi
Pa'kuhhu'sumanga'ko lako olo-Na Debata.

O... inggannakoa' umma'na Puang Allataala
Kamaseiko padammu ma'hupatau
umba susi ungkamasei kalemu
Susim too dipogau' umpomasannam penaban-Na Debata.

To mantuli': Putera Kura – Kura (Tanete)

Batu Maguhissim Umponnoi Langi'

Mesa batu kasalle
Handam mapia situhu' pa'papiian-Na
O.. Ambeku yabo tängäna langi'
To umpadadi inde lino.

O.. Tomahajanku Yesus
To ungkambi' ma'hupatau
O.. Ambeku Yesus Debatanku
Bengkam wattu sipanampum mesa sola mesa
Lambi' tihokongkam matim.

Botto Malobäku anna Tondä' Lamungam

Taboningku

Indonesiaku lappa' illaam mai pandahhaam
Anna mala umpe'guhui kamanähängänna to lino
O.. tondä'ku pitu ulunna salu
Kahua ba'bana Minanga.

Anu' to puha sämbätu' anna sakutu'
O.. to ma'pahentaku anna to keada'ku
Tasikamasea' sipepaihangam

Lako mentu' issinna Pitu Ulunna Salu
O..inggannakoa' solasubungku
Maingkoa' tapengkähä aka la dikilalai
Kamapi'disam illaam taum kahua pulona pitu.

To mantuli': Mama' Lian (Peba Tanete)

Allo Pengkitaam Kalappasam

Tisohommi allo mahapa' tihandu'um wattu mahändä
Mendendem katadam, mellingkam wattu titande
Memuttum tula' sambätu'
Memanta' kada kamesaam.

Sulem allo mahosom
Lendu'um ajoka manahhu'
Tihisim tengko pamoso
tipungngu'um kada sahandam

O... Allo dipemandanni
Titata'um sanganna pa'bottoam
Lantummi hupanna libusam
Tiangkahammi gallahanna Indonesia – botto masangka

O ... ingannako to tadongkom
To muisunni palanta'na pa'bottoam
Tilaka'um ehanna kalappasam
Tiballa'um sali-salinna okkosam kapiaam

O.. ingannako to tihekem ponno
Handu' tandai di mata allo, lele di katampusam

tammuko hongko' tandeanni dalle
soeanni tekkem matoto'na kamesaam
sajoanni unta' madaum pa'pemalolo

Situhu' pasanna pa'bottoam
Siba'ba' takinna pa'lembängam
Pengke'de'ko yabona katilallasam
pentek kako untete pa'kuhhusam sumanga'.

Mana' anna Hongko'

Tianta' matim kada sabatta
Tisohom tula' salolo
La umpelamba' laoanna tulasam pa'maha'-maha'
Umpemandalam okkosanna anna kasuleanna himpa'

O... mentu'ko to puha ditodinni
Tuhummi Too'na Sangka' sambolo-bulo
Tihandu'um Ulalanna To muundu' lollä
Tihampa'um salunna to untahhu' mandalam

La uhhuhu' mentu' hupatau
To sipendudum kaponanna kasalaam
To silolem kamapahhisam anna uwai mata
To napipi' anna nahuham sussa anna lupu'

O... inggannako to puha ditono' dipile
Puham dilentem mana' membulabam
Puham tilele hongko' mekuhita'
mellole' di allo temo, tianna di allo makale'

Mehhantem mana' tangkaduangam
Ba'ka' anna lanto kada peallu petundam

La sikaso dimaniinna anna la silindo illaam wattu didako'na
Nasuhum sundum la dipotubo ganna la diposakke

Tumbum kada pelambe
Tiangkaham pampujiam pa'pakasalle
Untammu anna umpaipala' bua sanda silapi
Unteggeham laoanna pa'mana uningkambi' ulalanna hongko.

To mantuli': Lite Akeka (Tanete)

Kamapiaam Lembäta tä' Deem la Pi'de

Moninna dassi sitimba'-timba' mahoa'
Untandai la sule oom allo bakahu
Kusi'dim kamalinoam ponno tama kaleko
Anggasanna anggam kao umpuängänni inde lino

Kututu'i matangku sapäi'
Kuette' limangku sapäi'
Kamanamangam – kamalinoam
Anggasangku mentia' illaam kamasannangam

O... To umpadadi langi' anna lino
Pa'pakasalleku matim tä' mala dilabai
Napahandu' mebengngi' sule lako bengi
Kamapiaam botto litä'ku tä' deem la pi'de

Moninna hibu' längäm tanete sihhapam to mahhoeam
Sikasajo tanangam nateppa hibu'
Mania samapia kusi'dim
Sapo'..... o... inggannakoa' solasubum

Pahallu anna pahallu tajagai
Anna mala inde kamapiaanna lembäta tä' deem la pi'de.

To mantuli': Loly (Tanete)

“Indonesia Kadadiangku”

Indonesia tondä' kadadiangku
Indonesia lamungam taboringku
Tä' kukalembei lambi' mateku
Masannam penabangku mutadongkonii

Pitu pulom lima taunna lessu'
Anna ditandeanni bendeha kapataloanta
Dipengkilalai allo temo
Tanggala' sapulo pitu bulam kahua taum dua sa'bu dua pulo

Mentu'nako änä' gassim
Maingko tapasahandam kada
Tapa'mesa illaam mentu' kaha-kaha
Mutammu lino ponno katipadendeam.

Katuboam Bakahu Illaam Puang Yesus

Anggam mutuhu' Puang Yesus deem kasalamasam
Anggam mutuhu' Puang Yesus deem kamalinoam
Anggam mutuhu' Puang Yesus deem kamasannangam
Tontä la kutuhu' Puang Yesus aka la unkgambi' sungnga'ku

Kaheba kasalamasam illaam Puang Yesus
Katappa'i tontä sule lako salako-lakona

Puha titollo hahana ditoke' yabo kaju sitambem
Musolom dosa ma'hupa tau

O.... ingngannakoa' ma'hupatau
Pengkato'ba'koa' dio oloNa
Sossoko gau'mu ammu katappa'i
Puang Yesus ponno pa'kamase
Tubo bakahuko illam sanganNa Puang Yesus.

Sikamase

Pahallukoa' siala penaba solamu
Sipenabaam anna sipakamaja solamu
Sihhapam solasubummu
Sikamase anna mahempo penaba

Buda tau mutula' kadakeko
Buda tau mukahidi'ko daa mupabalii
Ke natampilinni papo kaihimmu tau
Bempolepi papo kanammu

Inggannako solasubungku
lam too tiaanna illam Suha' Maseho
La tapengganda'i illam salukatoboanta
Natamba'ki' Debata pada-pada.

Sambajangku

O Ambe', suleä' matim oloMu
KupujiKo kupamatande sangamMu
Aka mala tontä mujagaiä' allo anna bengi
Sule lako allo tentomai

Puang To Handam Kuasa
Kubeho mentu' pattujungku
Iko Puang la mupasule lakoi

Puang yabo suhuga
Mentu'na kasalaangku
Mentu'na dosa budangku
Anggam iko la mupanampunnä'.

To Matappa' Dipassihapam Ballo anna Sia

Ke pa'dei ballo ta' diita mellao
Ke pa'dei sia tä' mammi' kinande
Susim too duka' batako Suha' Maseho mupoballo
Pa'gau' mapiako anna masingko dipenabaam

Menna-menna to matappa' tä' bassa' mambata
Kaputu-putu illam salu katuboanna
Menna-menna to matappa' ma'gau' kadake
Napa'lullu' solana battu diua padanna

Pakei unta' matoto'mu
Mutammu mentu' balimmu
Balimmmu sihhapam singa
Melo' la muamma' kalebu to matappa'.

Maka' maelo'ko umbata, umpehingngii, anna umpetua'
basa Bambam, iya bukkai inde situs internet:
<http://www.basabambam.com>.

Mala duka' dilambi' muolai inde tanda QR.



Siaran stasiun **Radio Ballo Mamase** mala dilambi' dioi
FM 107,9